

Uhtuan "Lintuni" piti 5-vuotispuuasniekkoa

29. sulakuuta Kalevalan Lintuni -nimisen päiväkodin tiloissa keräyty äijän juhlarahvasta. Tuas alko ely ämmöjen ta ukkojen kieli. Ta se toivissah eläy tiälä.

Lintuni ei ole tavallini lapsien päiväkoti: tiälä koko päivä lapsien kera paissah vain karjalaksi. Lapsien Lintusessa ruatah innokkahat kasvattajat **Nadezhda Lutohina, Anna Rauss** ta heijän apulaini **Antonina Koreneva**.

Päiväkoin kasvattajat ta lapset tervehyksellä avattih puasniekka. Mieltä lämmitti lapsien laulut, tanssit, lorut ta runot. Annettih vuoro entisillä kielipesän lintusilla - hyö ollah nyt jo koululaisie ta opassetah heilä karjalan kielttä koulussa. Lintusie tuli onnittelomah **V. Saburovan** johtama Hepokatti-perinneyryhmä. Hepokatit reippahilla laululeikeillä suatih puasniekkaarahas laulomah ta tanssimah.

Juhlassa näytti omua näytelyö Tšišiliusku -kuklateatteri Petroskoista. Vanhemmat ta lapset mielelläh kattööttih starinua 'Kun hukka vasikalla muamona oli'.

Uhut-seuran puolesta. Lintusie onnitteli **Svetlana Staskoit**, Kalevalassah toimivan Uhut-seuran hallinnon puheenjohtaja. Hiän kerto tervehyisie Suomesta, Uhtua-seuran puheenjohtajalta Hannu Raulolta ta lahjoitti suomalaisilta avustajilta a kopiokoneen.

Kalevalan piirin piänmiehen sijahini **Nina Stankevics** mainitti, jotta. tässä päiväkoissa ruatah nerokkahat kasvattajat ta toivoi heilä menessystä. Lahjaksi Kalevalan piirin hallinnolta tuli televisiuri.

Suurta intoa ta pitkyä ikyä toivottih Valtion Rahvahallisen politiikan komitean ruatajat **Natalja Antonova** ta **Valentina Karakina** ta Petroskoin valtion yliopiston professori **Pekka Zaikov**. Hyö lahjotettih opassuskirjoja ta pelijä.

Onnittelomah Lintusie tultih Kalevalan piirin opasusosaston ta Oravaiset-kielipesän ruatajat ta Kalevalan keskikoulun johtaja **Valentina Kovalenko**. Lapsien vanhemmathi sanottih suuret pas-



Päiväkodin pikkuraiset artistat esintymislavalla.

sipot päiväkojin ruatajilla. Lapsett suurella himolla mändäh päiväkotih. Heilä on hyvä ollaa tiälä, kun lähellä ollah hyväntahtoset ta syvämelisiet ihmiset. Lapset opassutah äijän karjalaisie lauluja, tanssija, uusie sanoja. Hyö vielä apua annetah "kielettömillä" vanhenmillah.

Esityksien ta onnittelujen jälkeh kaikkie vuotti puasniekkastola. Mitä sielä vain ei ollun! A mi stola ilmain karjalaisie perintehellisie sriäpnie! Tässä autettih päiväkojin lapsien vanhemmat. Heilä oli anettu semmoini kotitehtävä - sriäppie ta esittyö omua ruokalajie. Ämmöt ta muamot näytettih, mimmoset hyö ollah muasterit sriäppimäh. Stolalla oli kalakukkoha ta potakkasankie, kakkarua ta sultšinoja, marjakaisie. Mielihistä syötävyö oltih kalanmähäletut. Kaikkien mielestä parahin oli Kostja Malikinin muamon sriäppimä kalakukko. Tšuajustolassa pakinua riitti, aika kului mukavasti.

Puasniekka onnistui hyvin. Puolestani tahtosin sanuo suuret passipot tämän juhlan järjestäjillä, Lintusen kasvattajilla ta toivuo heilä lykkyö oman kielen ta perintehien säilyttämissen ruavossa.

NINA ALEKSEJEVA,
'Inna-lintusen' - muamo,
karjalan - ta suomen
kielen opastaja

Laulajat runomailta Uhtua Elegia-kuorolla 10 vuotta

Jos Kalevalan runomailla nykyjä vähäksi käy runoilijat, niin laulajie ainakin vielä on. Ta semmosie, ketä voit kuunnella monta tuntie peräkkäh - niin ihanasti soi heijän iänet. Sen voijah tovistua kuuntelijat sekä Karjalassah että Suomessa. Pakina on Kalevalan kulttuuritalossa toimivasta naisien Elegia-kuorosta. Toukuussa ryhmä täytti 10 vuotta.

Tämän merkkipäivän kunniaksi kulttuuritalolla järjestettih juhlakonsertti. Kaikki kuoron parahimmat romanssit, venäläiset ta suomalaiset laulut esitettih yleisöllä.

Kymmenen vuotta - se on melko pitkä taival. Ei jokahisella riittä voimua käyvvä työn jälkeh harjoituksih, jättyä syrjän kotiruavot pereh, lapset. Vain nämä 14 naista eivät anna periksi. Kuoron johtaja **Hertta Remsu** on varma, jotta tiettyinä päivinä naiset keräyhytäh kulttuuritalon suojah laulamah, opastumah uusie lauluja ta samalla nostamah esittämistasua. Ei yksikänä puasniekka Uhtualla onnissu ilmaan

kaunehie Elegia - kuoron lauluja.

Heijät tunnetah ympäri Karjalaa ta Suomessaki. Kuoron uskolin kattsoja Jari Helmisaari Yläneeltä on järjestän ryhmän matkoja Suomen puolella, missä heilä oltih yhteisie esityksie. Tällä tavalla kuorolaiset tuuvah rahvahalailuo ta hyvyö mieltä. Juhlapäivän merkissä laulajat suatih äijän onnitteluja, kumpasista liiakhattavat oltih heijän lapsien ta punukojien esitys. Se merkittäöy, jotta laulu ei lopu ta eläy tulevissa polvissa. Ohjelmah kuulu virallisieki onnitteluja; niitä oltih lausumassa **Nina Stankevics**, Kalevalan piirin piänmiehen sijaini, **Aleksandr Drjushin**, Kalevalan kyläpiällikkö. Uhtua- ta Uhut -seurojen puolesta tervehyisie kerto **Svetlana Staskoit** ta lisäksi lahjoitti naisilla uuvet esityshamehet. Toivotamma Elegia-kuorolla pitkyä elämyä ta menessystä heijän jalossa harrastuksessa!

Valentina Saburova
Kalevalan kansan-
teatterinohjaaja

Vuokkiniemi-seura ry.
onnittelee 100-vuotiasta
Karjalan Sivistysseuraa

